

西崑
訓
唱
集

上海圖書館藏書

西 崑 訓 唱 集

楊 億 等 撰

上海图书馆藏书



A541 212 0009 1159B

商 務 印 書 館 發 行

~~262509~~

重刻西崑詠唱集序

唐二百八十年朝以詩取士。士以詩爲業。童而習焉。長而精焉。其法同也。其義同也。其所讀書同也。所不同者。時世先後。風氣淳薄而已。初未有各樹其說。自立牆戶者也。歷來作家。或以清真勝。或以雅艷勝。門庭施設。各各不同。究於三百六義之旨。何嘗不同歸一轍哉。自宋以來。試士易制。詩各一塗。遂將李唐一代制作。四分五裂。若黃山谷。陳后山輩。雅好麤豪。尊昌黎爲鼻祖。而牽連杜工部。徑直之作爲證。遂名黃陳。號江西體。或無事芻狗衣冠。專事清永澹寂。以韋孟高岑爲宗。謂之九僧四靈體。有以李玉溪爲宗。而佐之以溫飛卿。曹唐羅鄴。若錢思公。楊大年諸公。一以細潤清麗爲貴。謂之西崑體。要皆自宋人分之。而唐初無是說焉。元和太和之代。李義山傑起中原。與太原溫庭筠。南郡段成式。皆以格韻清拔。才藻優裕。爲西崑三十六。以三人俱行十六也。西崑者。取玉山策府之意云爾。趙宋之錢楊劉諸君子。競效其體。互相詠唱。悉反江西之舊製。爲文錦之章。錄成一集。名曰西崑詠唱。不隔一朝。遽爾湮沒。自勝國名人。以逮牧齋老叟。皆以不得見爲歎息。其所以殷殷於作者之口久矣。昔年西河毛季子。從吳門拾得抄白舊本。狂喜而告於徐司寇健菴先生。健菴遂以付梓。汲汲乎惟恐其書之又亡也。刻成而以劖劖未精。祕不以示人。吳門壹是堂。又以其傳之不廣。而更爲雕板。嗟乎。此書之不絕如線也。乃得好事之兩家。而無虞其不傳矣。今又得閩仙朱子。從兩家之後。而三梓之。豈不欲使騷壇吟社。無有不覩是書之目。而後愉快哉。

夫三君之好是書者至矣。所以爲此書謀者亦無不盡矣。然而閩仙之意亦良苦矣。大凡人抱沈痼之疾。久服大黃甘遂。必至利削發狂而不可救。今江西之說詩家之快利藥物也。深入肺腑。十牛不能挽。則其橫溢顛蹶之禍可憂也。苟不以是書整飭之。救正之。文焉而去其鄙野。典焉而去其樸。檄儒雅清越。以入乎三百六義之中。則風雅之道。其能無愧於有唐一代之文藻歟。刻成而不以老耄舍我。屬題簡端如此。虞山簡緣馮武。

重刻西崑詠唱集序

風雅可追。韻言斯富。才人擗管。欲拂拂以成雲。逸客微吟。咸颯颯乎入耳。何況詩場好事。做前哲之體裁。藝圃名流。爲一時之詠唱。寧非勝致。自合流傳。乃經日月之幾何。已悼篇章之淪佚。將求石室。都無二酉之藏。欲問雞林。未有千金之購。遂使前朝宿學。蔑由睹此遺書。昭代耆儒。靡不嗟爲闕典。彼夫荆南唱和。漢上題襟。抑又遐哉。宜其缺矣。虞山毛子。汲古後昆。雅善蒐羅。徧能弋獲。幾同拱璧。珍諸貝錦。奚囊偶過。高軒。出自芸籤。鄴架。升不覺撫書而歎也。嗟乎。西崑之製。昉於有唐。酬唱之篇。殷乎前宋。歌風咏雪。情宛轉以相關。刻玉雕金。句琳琅而可誦。無心契合。詩成應不讓元和。有意規模。賦就亦能追正始。清新體格。俱流香艷於行閒。細膩風流。一洗叫囂於腕下。樹五七言之壁壘。致足相當。追三十六之風流。真能學步。則此一集也。均屬前人之逸響。伊何昔也亡而今也存。緬惟數子之清才。恍若前者唱而後者和。假令私之爲寶。祕不示人。有美弗傳。將見喑於大雅。微言欲絕。懼開罪於先民。爰選棗梨。亟爲剞劂。公諸同好。通韻海之津梁。贅以弁言。佐騷壇之鼓吹。絕而復續。非造物之無心。傳之其人。辛斯文之未喪。時康熙戊子孟春之吉。長洲後學朱俊升閔仙氏謹序。

西崑詠唱集序

翰林學士戶部郎中知制誥楊億述

余景德中忝佐修書之任。得接羣公之遊。時今紫微錢君希聖。祕閣劉君子儀。並負懿文。尤精雅道。雕章麗句。膾炙人口。予得以遊其牆藩。而咨其模楷。二君成人之美。不我遐棄。博約誘掖。寘之同聲。因以歷覽遺編。研味前作。挹其芳潤。發於希慕。更迭唱和。互相切劘。而予以固陋之姿。參詠繼之末。入蘭游霧。雖獲益以居多。觀海學山。歎知量而中止。旣恨其不至。又犯乎不韙。雖榮於託驥。亦媿乎續貂。閒然於茲。顏厚何已。凡五七言律詩二百有五十章。其屬而和者。計十有五人。析爲二卷。取玉山策府之名。命之曰西崑詠唱集云。

西崑詠唱集目錄

卷上

受詔修書述懷感事二首

南朝四首

禁中庭樹三首

休沐端居有懷希聖少卿學士五首

再次首唱韻和二首

槿花四首

代意八首

漢武七首

館中新蟬六首

夜燕四首

鶴五首

公子三首

西崑詠唱集卷上 目錄

西崑酬唱集卷上 目錄

舊將四首

宣曲三首

赤日三首

明皇二首

別墅三首

無題三首

荷花四首

再賦四首

再賦七言三首

又贈絕句四首

梨四首

淚六首

七夕三首

成都三首

秋夜對月三首

前檻二首

小園秋夕三首

始皇三首

初秋屬疾三首

此
页
空
白

西崑詠唱集目錄

卷下

寄靈仙觀舒職方學士三首

答內翰學士一首

答錢少卿一首

答劉學士一首

宋玉三首

送客不及三首

夕陽三首

樞密王左丞宅新菊四首

直夜三首

洞戶二首

柳絮三首

與客啓明三首

無題二首

譯經光梵大師二首

霜月四首

此夕三首

劉校理屬疾二首

勸石集賢飲三首

卽目二首

燈夕寄獻內翰號略公四首

李舍人獨直二首

無題四首

懷舊居三首

偶懷二首

許洞歸吳中三首

上巳玉津園賜宴三首

致齋太一宮三首

直夜四首

櫻桃二首

暑詠寄梅集賢二首

苦熱四首

屬疾四首

因人話建溪舊居一首

清風七首

戊申年七夕二十五首

秋夕池上二首

偶作二首

螢二首

西崑訓唱集卷上

受詔修書述懷感事三十韻

左司諫知制誥楊 億

太極垂裳日。中原偃革初。樓船秋發詠。衡石夜程書。好問虛前席。徵賢走傳車。蓬萊倖漢制。煨燼訪秦餘。
紉繹資金匱。規模出玉除。紛紛開四部。祕邃接千廬。飫賜雙雞膳。親迴六尺輿。華芝下閭闔。白羽擁儲胥。
望氣成龍虎。披文辨魯魚。清光無咫尺。元覽亦躊躇。羣彥揮鉛筆。微生濫石渠。嵇康真懶慢。謝客本空疎。
講學情田塉。談經腹笥虛。月評依許劭。文體慕相如。雅飲歡娛洽。清言鄙恹祛。彌旬容出沐。終日喜羣居。
撫已慙鳴玉。歸田憶荷鋤。池籠養魚鳥。章服裹猿狙。圓府愁尸祿。天關媿弊裾。虛名同鄭璞。散質類莊樗。
國士誰知我。鄰家或侮予。放懷齊指馬。屏息度羲舒。寡婦疑憂緯。三公亦灌蔬。危心惟穀觶。直道思籛籒。
往聖容巢許。先儒美寧蘧。晨趨歎勞止。夕惕念歸歟。秦痔疎杯酒。顏瓢賴斗儲。如諧曲肱臥。猶可直鉤漁。
矯矯龜銜印。翩翩隼畫旗。一麾終遂志。阮籍去騎驢。

大理評事祕閣校理劉 筠

良弼論思暇。英才視草餘。西清承密旨。東觀類羣書。左氏先經日。征南發例初。編年終顯德。歷帝自凡蘧。
一覽無前古。三長豈後予。宏綱提要妙。至論絕籛籒。訛謬刊三豕。公平喜衆狙。菁英咸采掇。疣贅盡銷除。

組織千章合。研窮萬象虛。胡爲參也魯。亦造仲尼居。處末加駢拇。於中或輔車。乘軒思衛鶴。努力效劉驢。見彈曾求炙。臨川復羨魚。孰云貂可續。自愧鶡難如。早入希東郭。先知服子輿。直非頭似筆。智謝里名樗。蝸舍遊從寡。鶉衣禮貌疎。寸陰嗟荏苒。十駕敢躊躇。天祿揚雄閣。承明嚴助廬。時陪折俎宴。頓異帶經鋤。繫日親函丈。他們絕曳裾。卓錫然有地。擔石尙無儲。獵犬方勞指。神龜可避漁。屠門誇大嚼。鼠壤鄙餘蔬。闕里辭難措。漳濱病且祛。學勤徒力爾。性拙奈天與。大道今興起。先生意卷舒。正爲王者瑞。何羨使君旟。暗室欣觀火。頽波賴決渠。當仁如退讓。末跡定淪胥。

南朝

楊億

五鼓端門漏滴稀。夜籤聲斷翠華飛。繁星曉埭聞雞度。細雨春場射雉歸。步試金蓮波濺襪。歌翻玉樹涕沾衣。龍盤王氣終三百。猶得澄瀾對敞扉。

太僕少卿直祕閣錢惟演

結綺臨春映夕霏。景陽鐘動曙星稀。潘妃寶釧光如晝。江令花牋落似飛。舴艋凌波朱火度。鯀稜拂漢紫煙微。自從飲馬秦淮水。蜀柳無因對殿幃。

劉筠

華林酒滿勸長星。青漆樓高未稱情。麝壁燈迴偏照畫。雀航波漲欲浮城。鐘聲但恐嚴妝晚。衣帶那知敵國輕。千古風流佳麗地。盡供哀思與蘭成。

翰林學士李宗諤

仙華玉壽夜沈沈。三閣齊雲複道深。平昔金鋪空廢苑。於今瓊樹有遺音。珠簾映寢方成夢。麝壁飄香未稱心。惆悵雷塘都幾日。吟魂醉魄已相尋。

禁中庭樹

翰林學士楊億

直幹依金闕。繁陰覆綺楹。纈珠晨露重。嘒管夜蟬清。霜桂丹邱路。星榆北斗城。歲寒徒自許。蜀柳笑孤貞。

錢惟演

紫闥分陰地。丹條擢秀時。高枝接溫樹。密葉覆辛夷。夜影瑤光接。晨英玉露滋。乘春好封殖。爲賦角弓詩。

劉筠

羽葉籠盤石。虬枝拂畫堂。夜聲含素瑟。曉影逼扶桑。好借鸞爲瑞。無容麝損香。甯知千載後。祇美召公棠。

休沐端居有懷希聖少卿學士楊億

凝塵滿榻素琴橫。岸幘孤吟意未平。茗粥露芽銷晝夜。柘漿雲液浣朝醒。水沈朱李金瓶澁。風獵幽蘭羽扇輕。獨憶當筵試湯餅。謫仙冰骨照人清。

錢惟演

雕盤瓊蕊冰去聲。寒澌密樹蟬嘶下。直時更賦新詩答靈運。不將團扇隔元規。經梅綠草緣階上。盡日流風

轉蕙遲。祇待觚稜照初旭。橫經還集絳紗幃。

劉筠

巖巖風簷乳燕翔。浴蘭衣綵簾流黃。雲容倏變千峯險。草色相沿百帶長。旋製紫荷供橐筆。暗移神蔡忍
搯牀。思君祇欲傾家釀。待警同誰賦柏梁。

著作佐郎直史館陳越

玉整銀牀蔭碧桐。北窗珍簾水紋融。衣裁練布如王導。扇執蒲葵學謝公。瓊屑半和仙掌露。蘭苕輕泛楚
臺風。若非冰雪神仙骨。相樂誰同一笑中。

戶部員外郎直集賢院李維

銀闕琳房視草餘。龍門岑寂斷軒車。彩毫閒試金壺墨。青案時看玉字書。王儉風流希謝傅。子雲詞賦敵
相如。瓊枝不見蕭齋晚。薰草煙微度綺疏。

再次首唱韻和

錢惟演

雲變危峯萬里橫。簾鋪湘水一牀平。紅蘭受露消晨渴。綠蕙翻風析夜醒。逸少偶書葵扇貴。羊欣閒臥練
裙輕。無妨天上芝泥熟。獨看瑤光近太清。

楊億

碧樹銀塘接畫樓。天人誰肯降瓊輈。三山密信傳青雀。五日歸鞍躍紫驄。郢酒泛冰星弁側。吳歛倚瑟黛
蛾愁。雲峯得句懷眞賞。瘦盡東陽沈隱侯。

槿花

劉筠

紫霧函燈檠。彤霞逼綺寮。吳宮何薄命。楚夢不終朝。半被曾羞問。鄰牆卻悔招。莫移風雨怨。更囑鵲爲橋。

楊億

宿霧初披縠。晨霞暫照梁。千金經換笑。七駕未成章。塵暗神妃襪。衣殘侍史香。深情傳寶瑟。終古怨清湘。

工部員外郎直集賢院劉 隲

號國妝初罷。高唐夢始迴。霓裳猶未解。繡被已成堆。赤帝宮簾卷。華陽洞戶開。神仙有良會。清唱在瑤臺。

錢惟演

綺霞初結處。珠露未晞時。寶樹甯三尺。華燈更九枝。亭亭方自喜。黯黯卻成悲。欲作飛煙散。猶憐返照遲。

楊億

代意二首

夢蘭前事悔成占。卻羨歸飛拂畫簷。錦瑟驚筵愁別鶴。星機促杼怨新縑。舞腰罷試收紈袖。博齒慵開委玉奩。幾夕離魂自無寐。楚天雲斷見涼蟾。

短夢殘妝慘別魂。白頭詞苦怨文園。誰容五馬傳心曲。祇許雙鸞見淚痕。易變肯隨南地橘。忘憂虛對北堂萱。回文信斷衣香歇。猶憶章臺走畫轅。

李宗諤

霧鸞曉影忽參差。雲雨陽臺役夢思。自是膠弦無續日。不同珪月有圓時。洞房斗帳承新愛。河漢星橋隔

後期綺榭凝塵斷消息。抒情空擬四愁詩。

樞密直學士丁謂

玦帶珊瑚珮解瓊。楚雲無定好傷情。臨邛已誤通琴意。金谷難尋辨玉聲。微警單棲盤露重。密含幽思曉蘭平。明珠百琲將何當。悵望輕軀病欲成。

駕部員外郎直祕閣刁衍

蕙時芳夕九回腸。斂袂東窗待曉光。秦嶺樹高迷隴塞。楚天雲淡隔瀟湘。病餘公幹情多詠。秋晚安仁鬢足霜。休道鮫人落珠淚。微波還擬託陳王。

劉筠

華池阿閣不相容。濁水清塵恨莫窮。明月自新班女扇。行雲無奈楚王風。乳鶯啼曉銷蘭炷。媚蝶傷春失蕙叢。縱使多才如子建。祇能援筆賦驚鴻。

闕題

劉筠

懊惱鴛鴦未白頭。卻尋遺翠失芳洲。離魂暗逐明珠佩。遠目偏傷紫桂樓。湘水渺瀰歸別渚。隴雲容與澹新秋。菖花若有重開日。得見菖花亦自羞。

楊億

落隔仙源不可尋。紫牆霜戟夜沈沈。絨情謾託傳書雁。換笑空餘取酒金。翡翠巢成珠樹密。驪龍睡起玉

淵深新知自樂生。離苦年少情多豈易禁。

漢武

楊億

蓬萊銀闕浪漫漫。弱水回風欲到難。光照竹宮勞夜拜。露溥金掌費朝餐。力通青海求龍種。死諱文成食馬肝。待詔先生齒編貝。那教索米向長安。

劉筠

漢武天臺切絳河。半涵非霧鬱嵯峨。桑田欲看他年變。匏子先成此日歌。夏鼎幾遷空象物。秦橋未就已沈波。相如作賦徒能諷。卻助飄飄逸氣多。

錢惟演

一曲橫汾鼓吹迴。侍臣高會柏梁臺。金芝燿煜凌晨見。青雀軒翔白晝來。立候東溟邀鶴駕。窮兵西極待龍媒。甘泉祭罷神光滅。更遣人間識玉杯。

刁衍

高宴柏梁詞可仰。橫汾簫鼓樂難窮。已教丞相開東閣。猶使將軍悞北戎。灑淚甘泉還有恨。祈年仙館惜成空。誰知辛苦回中道。共盡千齡五柞宮。

太常丞直集賢院任 隨

殊庭深恨隔仙曹。桂館蜚廉事轉勞。銀闕尚沈滄海闊。井幹空拂絳河高。蒼陽弋獵侵多稼。朔塞旌旗照

不毛。苦信憑虛。王母說東方。三度竊蟠桃。

劉 隴

高挹方諸薦水蒼。醮壇時見燭神光。日邊甲帳雖虛設。汾上樓船不可忘。盤蓋碧霄甘露白。鼎邊幽壤瑞雲黃。東巡岱岳探金策。倒指甯聞壽數長。

李宗諤

建章宮闕鬱嵒嶢。露掌修莖倚泐寥。平樂館中觀角觝。單于臺上懾天驕。蓬萊望氣滄波闊。太乙祈年紫府遙。西母不來東朔去。茂陵松柏冷蕭蕭。

館中新蟬

劉 筠

庭中嘉樹發華滋。可要螳螂共此時。翼薄乍舒宮女髻。蛻輕全解羽人尸。風來玉女烏先轉。露下金莖鶴未知。日永聲長兼夜思。肯容潘岳到秋悲。

楊 億

碧城青閣好追涼。高柳新聲逐吹長。貴伴金貂尊漢相。清含珠露怨齊王。蘭臺密侍初成賦。河朔歡遊正舉觴。雲鬢翠綉徒自許。先秋楚客已回腸。

錢惟演

冉冉光風泛紫蘭。新聲含怨日將殘。自憐伴雀成團扇。誰許迎秋集武冠。委脫亭皋隨木葉。飛綉雲表拂

仙盤青葱玉樹連金爵。不覺醯雞競羽翰。

樞密直學士張詠

脫塵還與比仙遊。露腹何妨近品流。嫩殼半遺紅藥地。細聲偏傍綠楊樓。詩家取象吟難盡。畫格偷真意不休。正好儒林擬綵繡。憑君無苦預悲秋。

李宗諤

雨過新聲出苑牆。煙輕餘韻度回塘。短亭疎柳臨官道。平野西風更夕陽。八斗陳思饒賦詠。二毛潘岳易悲涼。感時偏動騷人思。不問天涯與帝鄉。

劉隲

搖落何須宋玉悲。齊庭遺恨莫沾衣。池中菡萏香全減。井上梧桐葉乍飛。風促箏聲隨斷續。日移甄影自光輝。宜秋門外饒芳樹。結駟那堪送客歸。

夜讌

恩州刺史錢惟濟

清讌夜何其。南亭露欲晞。躡躑霞袖舞。澹灑羽觴飛。鏤窰搖花落。金璫照月輝。瑤光未西落。休賦醉言歸。

楊億

涼宵綺宴開。鄙淥湛芳壘。鶴蓋留飛鳥。珠喉怨落梅。薄雲齊鬢膩。流雪楚腰迴。巧笑傾城媚。雕章刻燭催。盤空珠有淚。鑪冷蕙成灰。巾角談棋勝。琴心促軫哀。醉羅驚夢枕。愁黛怯妝臺。風細傳疎漏。猶歌起夜來。

玳押風簾薄。金徒漏箭長。食魚齊上客。置醴漢元王。蒟醬辛初和。萍壘冷乍嘗。巢笙傳曲沃。摻鼓發漁陽。吟燭惟憂盡。杯籌豈易防。齒犀融嘖雪。柏麝薦荀香。笑逐呼盧勝。歌隨解珮狂。遺簪兼墮珥。流眄復回腸。綵鳳尋仙史。班騅待陸郎。主歡殊未已。投轄在銀牀。

劉筠

錢惟演

昨夜讌南堂。華燈燭九光。削青爭落筆。舉白鬪飛觴。祇覺輝裘玉。甯思夢謝塘。解煩多蜜勺。藉俎半蘭芳。促席風絃怨。開簾月露涼。酡顏君莫訴。西北轉銀潢。

鶴

劉筠

碧樹陰濃釵砌平。華亭歸夢曉頻驚。仙經若未標奇相。琴操何因寄恨聲。養氣自憐雞善勝。全身卻許雁能鳴。芝田玉水春雲伴。可得乘軒是所榮。

楊億

悵望青田碧草齊。帝鄉歸路阻丹梯。露濃漢苑宵猶警。雪滿梁園晝乍迷。瑞世鸞皇徒自許。繞枝烏鵲未成棲。終年已結雲羅恨。忍送西樓曉月低。

張詠

共憐潔白本天姿。縱在泥塵性不卑。況是稻梁厭足日。好尋烟月卻歸時。跡參詩雅何年盡。名系仙經四

海知應到崑邱。指來歷。曾陪鴛鴦浴華池。

任隨

何年玉羽別崑邱。飛舞長親十二樓。警露夜窺瑤圃月。翔雲高憶海天秋。肯教渠略知遐壽。會向神區更遠遊。正是溶溪煙水碧。好陪青鳳飲澄流。

錢惟演

碧樹陰濃接玉墀。幾年飛舞伴長離。天淵風雨多秋意。遼海煙波失舊期。自許一鳴聞迴漢。可隨三匝繞空枝。從來腐鼠何曾顧。不似鷓鴣枉見疑。

公子

楊億

夾道青樓拂綵霓。月軒宮袖按前溪。錦鱗河伯供烹鯉。金距鄰翁逐鬪雞。細雨墊巾過柳市。輕風側帽上銅隄。一作 珊瑚擊碎牛心熟。香棗蘭芳客自迷。

劉筠

油壁春一作香。車隔渭橋。黃山路遠苦相邀。行庖爨蠟雕胡熟。永埽鋪金汗血驕。別館橫陳張靜婉。期門長揖霍嫖姚。注鉤握槊曾無憚。綵桂膏濃曉未銷。

錢惟演

蓮勺交衢接荻園。來時十里一開筵。歌翻南國桃根曲。馬過章臺杏葉韉。別殿對迴雙綬貴。後門歸夜九

枝然閒隨翠幃。欹烏帽。紫陌三條入柳煙。

舊將

楊億

平生苦戰憶山西。拊劍臨風氣吐霓。戟戶當衢容駟馬。髯奴繞帳列生犀。新豐酒滿清商咽。武庫兵銷太白低。髀肉漸生衣帶緩。早朝空聽汝南雞。

劉筠

丈八蛇矛戰血乾。子孫今已列材官。青煙碧瓦開新第。白草黃雲廢舊壇。勞薄可甘先藺舌。爵高還許戴劉冠。秋來從獵長楊榭。矍鑠猶能一據鞍。

任隨

幾年塵虜復征蠻。分闡功成兩鬢斑。新畫儀形當漢閣。舊銘勳業在燕山。龍泉照步文犀澀。馬埒堆金駿足閒。時泰無因問充國。曉窗風雪夢陽關。

劉隲

強弩當年討不庭。功成身退炳丹青。囊沙澤畔知兵法。聚米山前識陣形。驥老未甘秋伏櫪。劍閒猶覺夜衝星。分茅錫土傳家牒。鐘鼎還須爲勒銘。

宣曲二十二韻

楊億

宣曲更衣寵高堂。薦枕榮十洲。銀闕峻三閣。玉梯橫鸞扇。裁紈製羊車。插竹迎南樓。看馬舞北埭。聽雞鳴。

綵縷知延壽。靈符爲避兵。粟眉長占額。蠶髮俯侵纓。蓮的沈寒水。芝房照畫楹。麝蟾薰翠被。鹿爪試銀筭。秦鳳來何晚。燕蘭夢未成。絲囊晨露溼。椒壁夜寒輕。綺段餘霞散。瑤林密雪晴。流風祕舞罷。初日靚汝明。雷響金車度。梅殘玉管清。銀鑲添舊恨。瓊樹怯新聲。洛媛迷芝館。星妃滯斗城。七絲絙綠綺。六箸鬪明珠。慣聽端明漏。愁聞上苑鶯。虛廊偏響屣。近署鎮嚴更。到藁心長苦。投籤夢自驚。雲波誰託意。璧月久含情。海闊桃難熟。天高桂漸生。銷魂璧臺路。千古樂池平。

劉筠

八月收民算。三千異典章。天機從此淺。國豔或非良。玉戶銅爲杳。羅幃象作牀。驪姬初悔泣。飛燕近專房。蓮小纔承步。梅新競試妝。盡知春可樂。終歎夜何長。取酒臨邛遠。吞聲忌國亡。難銷守宮血。易斷舞鸞腸。百草兼花鬪。雙鉤映燭藏。金人須手鑄。虎圈更身當。步輦回長樂。飛除接未央。琳琅飾歡館。藻繡裛周牆。厭火雙尾魚。鳴絃小雁行。雲臺澄顯氣。綺井激回光。路有斯須隔。憂難頃刻忘。新聲來樂府。別寢近溫湯。虹跨層臺晚。螢飛下苑涼。錦帷迎七夕。蓬餌薦重陽。九畹蘭承露。三江橘帶霜。方資裂繒笑。可要蕩舟狂。並釣池魚小。重衾穴鳳翔。珊瑚分碧樹。火齊列清防。背枕多幽怨。登樓更遠傷。下陳無自媿。人彘劇豺狼。

錢惟演

絳縷初分後。銀鑲未解時。已障紈扇笑。猶捧玉壺悲。乞功長生殿。迎風太液池。雕屏涵火齊。寶帳隔琉璃。欲買詞人賦。空傳狎客詩。蔗漿銷內熱。瓊蕊療朝飢。綺蒂桃初熟。紅心草欲披。淩波渡羅襪。向日翳華芝。

素臉分丹柰。香津滴紫梨。龍梭隨振素。纈隨補凝脂。蓬餌重陽節。金針七夕期。玉膏嘗瀝溢。翠蓋逐葳蕤。絃急哀隨指。歌長恨入眉。青鸞惟有舞。赤鳳可能疑。下蔡迷還易。平陽破未知。髻高釵自墮。腰細佩長垂。出恐嚴妝晚。歸嫌鈿幃遲。轆轤驚曉夢。鸚鵡漏春思。魂怨惟愁斷。腸柔已自危。壁璫螢影度。瓊戶蘚花滋。掩鼻讒難訴。披圖悔豈追。祇應金帶枕。聊爲達微詞。

赤日

楊億

赤日亭亭晝正賒。長風萬里憶星槎。銅盤瓊蕊三危露。素綆寒漿五色瓜。蘭室冷光浮玉簟。柳營清吹逐金茄。翠微泉石終南路。千古離宮倚曙霞。

錢惟演

漏淺風微夜未勝。雨雲無迹火雲凝。簟鋪寒水頻移枕。帳卷輕煙更背燈。沃頂幾思金掌露。滌煩誰借玉壺冰。蘭臺知有披襟處。宋玉多才獨自登。

劉筠

芒爍盛德正渾儀。休閒探湯向小兒。盡日羽陵開蠹簡。幾人河朔引芳卮。堯廚蓬莆頻搖處。漢殿相風未轉時。爭得琴高借雙鯉。暫遊姑射對冰姿。

明皇

楊億

玉牒開觀檢未封。鬪雞三百遠相從。紫雲度曲傳浮世。白石標年鑿半峯。河朔叛臣驚舞馬。消橋遺老識

真龍蓬山鈿合愁通信。迴首風濤一萬里。

錢惟演

山上湯泉架玉梁。雲中複道拂瑤光。絲囊暗結三危露。翠幃時遺百和香。枉是金雞親便坐。更拋珠被掩方牀。匆匆一曲涼州罷。萬里橋邊見夕陽。

劉筠

歲歲南山見壽星。百蠻回首奉威靈。梨園法部兼胡部。玉輦長亭復短亭。河鼓暗期隨日轉。馬嵬恨血染塵腥。西歸重按淩波舞。故老相看但涕零。

別墅

楊億

別墅過從數。當年意氣豪。象筵開旭日。金絡騁平皋。託乘爭飛蓋。銜杯更藉糟。麝煙凝藻梲。鱸縷落霜刀。雞簞花冠鬪。猿驚柘彈號。光風微轉蕙。露井正開桃。武子牛探炙。梁家兔刻毛。東城歸路晚。飛絮撲雲袍。

劉筠

感慨復風流。交通徧五侯。鳴鐘平樂宴。擊鞠茂陵游。狡兔方多穴。蒼鷹始下鞲。鈴奴藏廣柳。劍騎騁長楸。雲際尋撞技。花閒笑蹙樓。害先除白額。夢已應黃頭。燕酒惟增氣。秦箏漫送愁。鴻毛輕一死。祇待報私讎。

錢惟演

別館斗城傍。斜軒映曲房。蒼頭冠綠幘。中婦織流黃。複道登平樂。期門集未央。意錢梁冀宅。挾瑟莫愁堂。

走馬章臺柳。停車陌上桑。轂弓隨寶障。投轄付銀牀。出戴繁星急。歸衝細雨忙。曾過阿君宿。醉舞起跳梁。

無題三首

楊億

曲池波煖蕙風輕。頭白鴛鴦占綠萍。纔斷歌雲成夢雨。斗迴笑電作噴霆。湘蘭自古傳幽怨。秦鳳何年入杳冥。不待萱蘇蠲薄怒。閒階鬪雀有遺翎。

合歡蠲忿亦休論。夢蝶翩翩逐怨魂。祇待傾城終未笑。不曾亡國自無言。風翻林葉迷歸燕。露裊池荷觸戲鴛。湘水東流何日竭。煙篁千古見啼痕。

滿天飛絮冒游絲。鈿砌苔錢晦履綦。北渚自應流怨淚。東鄰誰敢效顰眉。嫦娥桂獨成幽恨。素女弦多有剩悲。幾夕空機愁促杼。銀河休問報章遲。

錢惟演

悞語成疑意已傷。春山低斂翠眉長。鄂君繡被朝猶掩。荀令薰爐冷自香。有恨豈因燕鳳去。無言甯爲息侯亡。合歡不待丁香結。祇得淒涼對燭房。

耿耿寒燈照醉羅。看朱成碧意如何。虎頭辟惡無妨枕。犀角涼心更待磨。惟有幽蘭啼月露。可將尺素託雲波。山屏六曲歸來夜。祇恐重投折齒梭。

香歇環沈無限猜。春陰濃淡畫簾開。有時盤馬看猶懶。盡日投壺笑未迴。蝶怨豈能重傅粉。雉嬌疑待更求媒。啼妝不治金翹闌。腸斷溫郎玉照臺。

走馬章臺冒雨歸。後門猶歎滯前期。荷心出水終無定。蘿蔓從風莫自持。複帳麝輕難辟惡。曲房蠶懶不成絲。漸漸麥隴藏鳴雉。更恨如皋一箭遲。

簾聲燭形浪多疑。仙穀何能爲解迷。藻井風高蛛壞網。杏梁春曉燕爭泥。更看山遠惟凝黛。縱許犀靈祇駭雞。枉裂霜縉幾千尺。紅蘭終夕露珠啼。

麝烈初難和。烏驚每易傷。蕩舟殊不禁。奔月可能防。洛浦多遺翠。秦樓滯采桑。飛蛾攢釵燭。綠鴨鬪銀塘。夜合花含霧。宜男草帶霜。琅玕餘舊貫。須要鳳求凰。

荷花

劉筠

水國開良宴。霞天湛晚暉。凌波宓妃至。盪槩莫愁歸。妝淺休啼臉。香清願襲衣。卽時聞鼓瑟。他日問支機。繡綺翩翩過。珍禽兩兩飛。牢收交甫佩。莫遣此心違。

楊億

絕岸疎煙合。回塘夕照和。水仙猶度曲。川后自收波。銀漢橋橫鵲。蘅皋襪濺羅。玉杯承露重。鈿扇起風多。翠羽芳洲近。青絲快騎過。石城秋信斷。搔首奈愁何。

錢惟演

水闊雨蕭蕭。風微影自搖。徐孺羞半面。楚女妒纖腰。別恨拋深浦。遺香逐畫橈。華燈連霧夕。鈿合映霞朝。

淚有鮫人見。魂須宋玉招。凌波終未渡。疑待鵲爲橋。

丁謂

相倚秋風立。蘭言似有無。未饒霜女俊。不愛月娥孤。力弱煙披素。心危露泣珠。翦裁隨楚思。幽怨寄吳歎。半坼香囊解。微傾醉弁扶。涉江如可採。百琲答輕軀。

再賦

劉筠

暮雨過湘渚。微涼滿楚宮。濺裙無限水。障袂幾多風。浪跡嫌萍實。塵勞笑菊叢。氣清防麝損。信密待魚通。游女歌爭發。騷人思未窮。休傳江北意。月冷魏池空。

楊億

舒女清泉滿。黃姑別渚通。巴天迷峽雨。楚澤映江楓。思逐鮫絲亂。香愁翠被空。灑從瓊蕊露。吹任石尤風。怨淚連疎竹。私書託過鴻。雙魚應共戲。休問葉西東。

錢惟演

玉盤引清泉。風高露白天。盈盈臨一水。翼翼隔長煙。已分蘭芝溺。仍憂趙后仙。鮫絲衣更密。珠串淚長圓。瑟怨來湘浦。鴻驚近洛川。金塘止斜照。誰倚木蘭船。

丁謂

彼美秋江上。塵埃恥託根。笑傾行雨國。香返夢蘭魂。蛺蝶無媒灼。鴛鴦見子孫。徧窺思兩槳。深鑱憶重門。

怯徇風波性。慚留月露痕。枉將金試步。千古怨黃昏。

再賦七言

劉筠

紉蘭爲佩。桂爲舟。北渚雲飛。發櫂謳。已有萬絲能結怨。不須千蓋強障羞。金隄勃率誰同上。翠帟繽紛客自留。欲選浣紗傾敵國。越王更起近江樓。

楊億

翠幄飄香映綺襦。鈿盤清曉露成珠。休啼爲近鮫人室。欲笑誰投玉女壺。雲氣乍迴巫峽夢。水嬉猶記曲池圖。金花卻薦何人步。枉遣凌波襪縷濡。

錢演

欲網珊瑚碧浪深。橫塘斜日對秋陰。漢宮此地留金餅。洛浦何人遺錦衾。舞學西城回雅態。歌傳南國有餘音。韓憑恨魄如長在。青骨香銷亦見尋。

又贈一絕

劉筠

粉白朱紅翡翠翹。漢宮等級不相饒。風波若未乖前約。一死何辭更抱橋。

楊億

瑤水霓旌綺宴陳。漢宮渠怨露華新。誰然百炬金花燭。渡襪歌梁暗落塵。

錢惟演

唾淚金銷月似霜。雲屏玉輦剩秋光。不知惟有高唐夢。翠被華燈徹曙香。

夢散高唐夜正遙。楚天何處不無膠。秋風似會荆王意。露渚煙汀養細腰。

梨

紫花青蒂壓枝繁。秋實離離出上蘭。東海圓珪無奈碧。嶠州甜雪不勝寒。已憂仙珮懸珠重。更恐金刀切玉難。自與相如解瘠渴。何須瓊蕊作朝餐。

楊億

繁花如雪早傷春。千樹封侯未是貧。漢苑漫傳盧橘賦。驪山曾識荔支塵。九秋青女霜添味。五夜方諸月溜津。楚客狂醒朝已解。水風猶自獵汀蘋。

劉筠

元光仙樹阻丹梯。御宿嘉名近可齊。真定早寒霜葉薄。樊川初曉露枝低。先時櫻熟煩羊酪。遠信梅酸損瓠犀。宋玉有情終未識。蔗漿無奈楚魂迷。

丁謂

搖搖繁實弄秋光。曾伴青裊薦武皇。元圃雲腴滋紺質。上林風馭獵清香。尋芳尙憶瓊爲樹。蠲渴因知玉有漿。多少好枝誰最見。冒霜丹頰倚鄰牆。

淚二首

楊億

錦字梭停掩夜機。白頭吟苦怨新知。誰聞隴水回腸後。更聽巴猿拭袂時。漢殿微涼金屋閉。魏宮清晚玉壺歎。多情不待悲秋意。祇是傷春鬢已絲。
寒風易水已成悲。亡國何人見黍離。枉是荆王疑美璞。更令楊子怨多歧。胡笳暮應三搥鼓。楚舞春臨百子池。未抵索居愁翠被。圓荷清曉露淋漓。

錢惟演

鮫盤千點怨吞聲。蠟炬風高翠箔輕。夜半商陵聞別鶴。酒闌安石對哀箏。銀屏欲去連珠迸。金屋初來玉筍橫。馬上悲歌寄黃鵠。紫臺回首暮雲平。
家在河陽路入秦。樓頭相望祇酸辛。江南滿目新亭宴。旗鼓傷心故國春。仙掌倚天頻滴露。方諸待月自涵津。荆王未辨連城價。腸斷南州抱壁人。

劉筠

雍門琴罷已浪浪。更上牛山半夕陽。楚澤雲迷千里目。薊門歌斷九迴腸。寒梅帶雨飄離席。尺素停燈作報章。湘水未乾終未盡。豈徒萬點寄疎篁。
含酸茹歎幾傷神。嗚咽交流流忽滿巾。建業江山非故國。灞陵風雨又殘春。虞歌決別知亡楚。燕酒初酣待報秦。欲訴青天銷積恨。月娥嬌獨更愁人。

七夕

清淺銀河暝。靄收漢宮。還起曝衣樓。共瞻月樹。憐飛鵲。誰泛星槎。見飲牛。弄杼。暫應停素手。穿針空待。睨明眸。匆匆一夕。填橋苦。不似人間有造舟。

劉筠

靈匹迢迢駕七襄。暫陳雲幄對星潢。已看素魄過三讓。何用華燈更九光。玉腕雙絲輕宛轉。霞衣雜珮暗丁當。誰言巧意能勝拙。祇見鳩閒鵲自忙。

錢惟演

紫天銀水渡辛夷。藻帳雕屏解佩時。金朔窗中窺阿母。小姑堂上憶蘭芝。初宵已有穿針樂。欲曙還成弄杼悲。若比人間更腸斷。萬重雲浪寄微辭。

成都

楊億

五丁力盡蜀川通。千古成都綠耐濃。白帝倉空蛙在井。青天路險劍爲峯。漫傳西漢祠神馬。已見南陽起臥龍。張載勒銘堪作戒。莫矜函谷一丸封。

劉筠

鏤膚剽俗恣遊遨。可得蹲鴟號富饒。井絡共知天與險。蠶叢無奈世興妖。杜鵑積恨花如血。諸葛遺靈柏半燒。才似文園何足道。一生琴意祇成瘳。

武侯千載有遺靈。盤石刀痕尙未平。巴婦自饒丹穴富。漢庭還責碧砮征。雨經蜀市應和酒。琴到臨邛別寄情。知有忠臣能叱馭。不論雲棧更崢嶸。

秋夜對月

楊億

孤雲飛隴首。顯氣滿商中。警鶴仙盤外。圓蟾浴殿東。浦寒珠有淚。巖迴樹生風。星彩沈榆莢。霜華襲柱叢。光搖銀燭亂。影射玉壺空。露館迷秦甸。冰臺接魏宮。繞枝驚暗鵲。促杼思陰蟲。更想離居恨。回腸幾處同。

劉筠

瑤席留歡友。金波對廣庭。重簾和霧卷。六幕極天清。屬玉東西館。琉璃左右屏。梁園休賦雪。隋苑漫飛螢。蟾滴全供硯。牛津不見星。綺窗分皎皎。苔閣自一作共亭亭。已喪應劉魄。誰通鮑謝靈。欲銷千里恨。魯酒薄還醒。

錢惟演

顯氣中秋正。明河左界長。桂孤香易散。蚌冷淚先汪。飛蓋傾蘭坂。鳴琴厭燭房。玉盤浮皓露。素綆凝寒漿。浪白江連楚。風淒笛怨羌。庾樓聊顧慕。潘省更悲涼。雪漫誇圓壁。珠休號夜光。嫦娥悔孀獨。空見海生桑。

前檻十二韻

楊億

前檻瓊鉤挂。深房斗帳褰。梨花飛白雪。蕙草吐青煙。彩鳳依珠樹。神龍護玉蓮。驚禽時格磔。戲蝶自翩翾。

度繡金針澀。迷鉤畫蠟煎。怨眉憑翠羽。危涕迸朱絃。遠信三年字。空庭五尺天。行雲愁夢徹。初日妒妝妍。織爲迴文亂。鬢非墮馬偏。風車來未定。月杵望長懸。寶鑿腸空斷。銀潢眼欲穿。曾波自東注。微意若爲傳。

劉筠

華柳陰岑院。游絲曠蕩春。蘅皋誰駐馬。羅襪自生塵。四姓良家子。三年賦客鄰。折腰行太緩。連瑣語何頻。倭墮雲爭媚。便娟月鬪新。滅瘢難辨玉。約指不勝銀。電笑投壺勝。汪澄擣練勻。東南勞鶴望。西北限牛津。寶唾凝蘭氣。鳴簧咽絳脣。籠禽思隴樹。洞犬謝秦人。詠絮才無對。聞琴意始真。長安足輕薄。慎勿走瓊輪。

小園秋夕

錢惟演

潘鬢秋來已自傷。庾園時物更荒涼。紫梨半熟連紅樹。碧蘚初圓亂縹牆。月露暗從孤桂滴。水風猶獵敗荷香。滑稽還喜鴟夷在。欲取臨邛美酒嘗。

楊億

鴻都歸晚直城賒。牆外連營咽暮笳。玉井梧傾猶待鳳。金塘柳密更藏鴉。心搖雲闕傳疎漏。目斷星津過迴槎。已是秋來移帶眼。可堪元鬢有霜華。

劉筠

枳落莎渠急夜蟲。儵然平子四愁中。栗林忽感雕陵鵠。雲表初過代嶺鴻。阮籍臥帷疎鑿月。馬融橫笛遠含風。郎潛吏隱前賢事。猶勝楊歧泣斷蓬。

始皇

衡石量書夜漏深。咸陽宮闕杳沈沈。滄波沃日虛鞭石。白刃凝霜柱鑄金。萬里長城穿地脈。八方馳道聽車音。儒坑未冷驪山火。三月青煙繞翠岑。

楊億

劉筠

利背由來得擅場。盡遷豪富入咸陽。屬車夜出迷雲雨。峻令朝行劇虎狼。前殿建旗凌紫極。東門立石見扶桑。從臣嘉頌徒虛美。不奈盧生識國亡。

錢惟演

天極周環百二都。六王鐘鐻接流一作劉蘇。金椎漫築甘泉道。七首還隨督亢圖。已覺副車驚博浪。更攜連弩望蓬壺。不將寸土封諸子。劉項由來是匹夫。

初秋屬疾

劉筠

秋陰淒淡隔重城。一晦居仍近禁營。漢苑樓臺沈暮影。謝家鼓吹發新聲。煙昏露井殘桃墜。葉下涼波獨鳥驚。節物變衰吟更苦。可堪漳浦臥劉楨。

楊億

潘郎已是入秋悲。屬疾猶貪桂補羸。密雪才高閒賦筆。流波意遠託琴絲。離愁盡日吟青案。獨渴何人見紫梨。昨夜西樓涼月滿。清談偏憶庾元規。

錢惟演

蜜房初滿若榴紅。秋意知侵玉井桐。薤簾自憑南郭几。縠巾猶臥北窗風。雲迷候雁辭遙塞。露溼飛螢起暗叢。病已不須傳七發。粉箋香墨寄詩筒。

西崑詠唱集卷下

寄靈仙觀舒職方學士

楊億

綠髮郎潛不記年。卻尋丹竈味靈篇。華陰學霧還成市。彭澤橫琴豈要絃。曉案祇應餐沆瀣。夜灘誰見弄潺湲。須知吏隱金門客。待乞刀圭作地仙。

錢惟演

方瞳元鬢粉闌郎。絳闕齋心奉紫皇。徵士高懷雲在嶺。騷人秋思水周堂。閒園露草開三徑。靈宇華燈燭九光。知有美田堪種玉。幾時春渚逐歸艎。

劉筠

石渠仙署久離羣。抗跡丹臺世絕倫。揚子不甘嘲尚白。漆園終許自全真。紫煙深處鸞雙舞。朱髓成來鳥共伸。若向雲中見雞犬。可能渾忘姓劉人。

答內翰學士

職方員外郎祕閣校理監舒州靈仙館舒雅

清貴無過近侍臣。多情猶憶舊交親。金蓮燭下裁詩句。麟角峯前寄隱淪。和氣忽飄燕谷煥。好風徐起謝庭春。緘藏便是山家寶。留與兒孫世不貧。

答錢少卿

舒雅

蓬萊閣下舊鄰居。偶別俄驚四載餘。每見寒葭思倚玉。忽臨秋水得雙魚。人間貴盛君誰及。物外優閒我自如。聞認歸艎向春渚。深知不與道情疎。

答劉學士

舒雅

往歲別京畿。棲山與衆違。君心似松柏。雁足寄珠璣。學道情雖篤。燒丹力尙微。雲中雞犬在。祇候主人歸。

宋玉

楊億

蘭臺清吹拂冠綏。薤草新居對渺漭。麗賦朝雲無處所。羈懷秋氣動齋咨。三年送目愁鄰媛。七澤迷魂怨楚詞。獨有江南哀句在。更傳餘恨到黃旗。

劉筠

楚國驕荒日已深。山川朝暮劇登臨。曾傷積毀亡師道。祇託微詞蕩主心。江草東西多恨色。峽雲高下結層陰。潘郎千載聞遺韻。又說經秋思不深。

錢惟演

章華清宴重游陪。已有微詞更有才。神女夢靈因賦感。屈平魂怨待招迴。悲秋終古情難盡。障袂何時望可來。祇用大言君自許。景差無計上蘭臺。

送客不及

劉筠

青門祖帳曙煙微。片席乘流鳥共飛。曲岸馬嘶風嫋嫋。短亭人散柳依依。灞陵目斷猶回望。楚水魂銷爲

送歸祇自河梁傳怨曲。洛塵千古化征衣。

錢惟演

橋闊川長恨已多。斑駁嘶斷隔雲羅。遙山幾疊迷朱旆。芳草經時駐玉珂。高鳥可能追夕照。綠楊空自拂微波。短轅白鼻何由得。目送層樓一雁過。

劉筠

日上旗亭第五重。百壺春釀與誰同。黃山遠隔奔霄騎。紫塞孤飛避弋鴻。湘竹幾時休染淚。楚旌終日自搖風。此情不及歌楊柳。一尺魚書萬水中。

夕陽

劉筠

夕陽堪極目。況復近秋殘。寒迴橫煙紫。江清照葉丹。伍胥嗟路遠。潘子念行難。更有蕪城恨。城空逼夜寒。

楊億

夕籟起汀葭。秋空送目賒。綠蕪平度鳥。紅樹遠連霞。水闊迷歸棹。風清咽迴笳。高樓未成下。天際玉鉤斜。

錢惟演

遠色連高樹。迴光射迴樓。自翻歸雁影。更急思蟲愁。煙暝長先隔。霞烘允未收。華燈知可繼。惟照洞房幽。

樞密王左丞宅新菊

楊億

中樞多暇日。小圃占秋光。雕玉新成檻。繁金乍泛觴。陶籬侵柳色。羅宅掩蘭芳。芝影連虛室。萱叢接後堂。

傳巖猶借雨。豐嶺未飛霜。溫樹偏分蔭。芸籤亦鬪香。交枝迷露井。墜葉點橫塘。桐錄知延壽。千齡奉紫皇。

劉筠

東閣留佳客。寒葩艷晚光。秋風自蕭瑟。台座對熒煌。麗奪雙南價。清含九畹香。嶸山霜薦味。太液鵠分棠。已助蜂成蜜。還隨蟻泛觴。俯臨輝艾綬。佩服閒莢房。節物傳荆俗。詩情掩謝塘。更期松偃蓋。永奉太清方。

錢惟演

賀燕翻飛地。靈芳茂遂時。陰連桃李徑。潤接鳳凰池。夕照輝金葆。輕風拂翠蕤。露珠清自沍。煙素引還披。西顯霜雖勁。南榮暖更滋。攝芳多楚澤。得地勝陶籬。味可登蘭籍。香應奪桂旗。願公長卻老。晏寢奉瓊卮。

李維

青規前席暇。歸沐興何長。北第秋將晚。東籬菊正芳。幽叢霏薄霧。桂色艷輕霜。已近黃金印。兼臨白玉堂。甘疑掩萍實。秀肯讓芝房。有佞還應指。無憂可要忘。蕊浮丞相酒。氣馥令君香。好固松椿壽。仙經識祕方。

直夜

楊儔

繚垣曉闕慶雲深。畫燭熏爐對擁衾。三殿夜籤傳漏箭。九秋霜籟入風琴。階前槁葉驚寒雨。天際孤鴻答迴砧。欹枕便成魚鳥夢。豈知名路有機心。

錢惟演

千廬徼道發傳呼。帝宇沈沈璧月孤。重撥祇聞喧鬪鼠。危枝誰見繞驚烏。石螭霜重連鉤盾。玉虎冰銷下

鞭韃素髮自憐同騎省。一竿何日釣秋鱸。

劉 筠

雞人肅唱發章溝。漢殿重重虎戟稠。綵羽欲棲温室樹。金波先上結麟樓。風來太液聞鳴鶴。霧卷明河見飲牛。萬國表章頻奏瑞。手批天語思如流。

洞戶

楊 億

洞戶飛甍接綺寮。一春幽恨寄蘭苕。書題枉是藏三歲。壺矢誰同賽百嬌。水國風霜凋社橘。仙山雲霧隔江潮。東城劍騎何曾出。祇爲離愁髀肉銷。

劉 筠

百尺青樓大道邊。五陵游騎曉翩翾。不思夜魄過三五。祇問春醪賞十千。密鎖香雲深處戶。亂飄梨雪晚來天。愁眉豈待歌成慘。咫尺河陽信未傳。

柳絮

楊 億

瓊蕊飄英逐吹繁。建章飛舞入千門。羌人自怨殘梅曲。莊叟還迷夢蝶魂。漢苑風光隨獵騎。洛城花雪撲離樽。錦帆蔽日隋隄遠。枉逐東流箭浪翻。

劉 筠

半減依依學轉蓬。斑駁無奈恣西東。平沙千里經春雪。廣陌三條盡日風。北斗城高連蠓蠖。甘泉樹密蔽

青葱漢家舊苑眠應足。豈覺黃金萬縷空。

錢惟演

三月江南花漸稀。春陰漠漠雪霏霏。章臺街裏翻輕吹。灞水橋邊送落暉。陸凱傳情梅暗落。韓憑遺恨蝶爭飛。詔書漫道吹綸薄。誰見紛紛上客衣。

與客啓明

錢惟演

越溪微霰灑寒梅。家近嚴陵古釣臺。夢欲成魚通夕去。書曾憑犬隔秋回。干時不爲侏儒米。樂聖猶銜叔夜杯。帝右豈無楊得意。漢宮須薦長卿才。

楊億

越客逃名誤繫環。漢庭初聘碧雞才。操心四十知無惑。削牘三千恥自媒。吟苦多年依洛社。賦成他日上蘭臺。郡齋懸榻留塵滿。七見東風落楚梅。

劉筠

秦痔從來易得車。鄰枝今比我何如。垂天借喻齊諸志。握火尋盟越絕書。旭日西清雲幄密。朔風南陌葦衣疎。故山夜鶴空多怨。金屋人爭誦子虛。

無題

楊億

巫陽歸蕉隔千峯。辟惡香銷翠被空。桂魄漸虧愁曉月。蕉心不展怨春風。遙山黯黯眉長斂。一水盈盈語

未通漫託鷓鴣絃。傳恨意雲鬢。日夕似飛蓬。

絳縷初分麝氣濃。絃聲不動意潛通。圓蟾可見還歸海。媚蝶多驚欲御風。紈扇寄情雖自潔。玉壺承淚祇凝紅。秦窗亦有心知夢。未到鳴鐘已旋空。

譯經光梵大師

楊億

薪火滅雙林。誰傳七佛心。譯筵香篆絕。經葉蠹魚侵。狴座雲雷歇。龍宮歲月深。青蓮流半偈。白馬度千岑。大士招提啓。明君羽葆臨。對翻天竺字。助發海潮音。空界花成雨。仁祠地布金。九旬談妙理。三接簡宸襟。淨社延居士。生臺集野禽。琅函香拂袂。奈苑樹交陰。文字蹄求兔。機緣芥值針。龍華他日會。應記洛生吟。

劉筠

漢夢通西域。逍遙廣舊園。竺乾方演教。金粟豈忘言。硯滴寒蟾吐。臺香瑞獸噴。揮毫花滿袖。隱几雪盈門。大士清歌發。南宗密印存。縱橫十二部。慧日破重昏。

霜月

錢惟演

霜月正如鉤。臨池更上樓。沈侯新覺瘦。宋玉舊多愁。癩髓分膏密。鵝毛寫恨稠。長懷寄歸雁。歸雁自悠悠。

楊億

月夕露爲霜。心知厭獨房。吟箋猶擁鼻。望極自迴腸。鬢減前秋綠。衣消外國香。星津誰待報。織素未成章。

霜曉月仍殘。桐疎鳳更單。已傷春寂寂。還踏夜漫漫。凍合仙槎路。薰餘侍史蘭。那知荀奉倩。體薄不勝寒。

劉筠

李維

銀牀葉暗飄。霜月夜迢迢。寒極金難辟。憂多酒漫銷。荀鱸殘更換。湘瑟罷仍調。誰道河流淺。盈盈萬里遙。

楊億

此夕

此夕秋風獵敗荷。玉鉤斜影轉庭柯。鮫人淚有千珠迸。楚客愁添萬斛多。錦里琴心誰滌器。石城桃葉自橫波。程鄉酒薄難成醉。帶眼頻移奈瘦何。

錢惟演

曲瓊斜挂影沈沈。火齊屏風六曲深。春瘦已寬連理帶。夜長誰有辟寒金。珠拋月浦空涵淚。琴怨蘭堂漫寄心。碧玉可能攀貴德。阮郎追騎更駸駸。

劉筠

南州石黛有遺妍。目極危梯月上弦。一水相望空脈脈。雙金何路致拳拳。仙源日永桃無援。客館春輕柳未眠。欲寫微詞託歸雁。風高嶺闊又經年。

劉校理屬疾

楊億

北窗風勁雪雲繁。移疾端居避世喧。載酒誰過揚子宅。張羅休署翟公門。多才最許飄飄氣。少別還銷黯黯

黯魂促爾徘徊憶真賞。遠天新月照黃昏。

劉筠

撫枕淒然掩北軒。漢庭誰問馬文園。風簷鷗嘯廚煙絕。月樹烏驚藥杵喧。戲集五禽成妙術。學虧一簣阻微言。不因九奏清塵耳。天路應迷簡子魂。

勸石集賢飲

楊億

日上三竿宿霧披。章臺走馬帽簷欹。祇傳祖席觴無算。肯顧尙書對有期。芸省繙經終寂寞。柳隄飛鞚好追隨。靈均不醉真何益。千古離騷怨楚詞。

李宗諤

都門祖轍綺筵張。舉白無由訴羽觴。石室紬書勤亦至。金貂換酒醉何妨。甕閒吏部甯須問。席上車公不可忘。應念朝來猶眊燥。解醒誰用蔗爲漿。

劉筠

豪家抱甕擅風流。更燎薰鑪白雪樓。魯壁休分科斗字。蜀都且換鸚鵡裘。仰天拊髀真爲樂。倒載穿腸肯易愁。欲膾長鯨置雕俎。願回北斗挹東流。

卽目

楊億

急雨度前軒。池荷相對翻。峯奇雲待族。蹊闌李無言。掩鼻生愁詠。披襟爽醉魂。一塵今已廢。猶戀漢庭恩。

地僻無車轍。心灰欲坐忘。疾雷徒破柱。幽草不迎涼。日烈蟬遺蛻。花休蜜滿房。覆觴知已久。甯有次公狂。

劉筠

燈夕寄獻內翰號略公

錢惟演

曉闕暈飛河漢旁。句陳避認赭袍光。九枝火樹連金狄。萬里霜輪上碧璫。匝地行車珠網細。照天晨燎紫沈香。祇聞鼇嶺神仙客。再拜雲邊捧壽觴。

楊億

瓊樓十二玉梯斜。乾鵠南飛轉斗車。有客郢中歌白雪。幾人天上醉流霞。金吾緹騎章臺陌。素女繁絃太帝家。秦痔未痊齊閣掩。夢回宮樹已啼鴉。

李宗諤

東城南陌盡遊人。陌上香車起暗塵。歷歷星榆光奪晝。煌煌火樹豔爭春。章溝五鼓催行樂。衛尉千廬罷徼巡。應念鼇山方併宿。紫泥封後獨頻伸。

劉筠

千輪佛火照層城。九陌香車擊迅靈。簡子最知天帝樂。孟家惟信紫姑靈。金徒抱箭催壺水。玉宇來風滿砌。奠簾卷交疏。蓮燭密通中枕。上獨聞鈴。

李舍人獨直

楊億

閣鳳巢高拂綵霓。玉芝香雜武都泥。十行漢札如絲出。六幕堯天倚杵低。露井冰銷垂素綆。仙莖日轉射璇題。赫蹄雲落知誰見。餘力何妨頌碧雞。

劉筠

卿寓重重覆壁門。獨揮鴻筆坐西垣。誠明自有中和氣。潤色還多郁穆言。內苑朱櫻兼酪賜。前階紅藥任風翻。紫絲新履徊翔地。應笑東方避世喧。

無題二首

楊億

銅盤薰草起青煙。斗帳香囊四角懸。沈約愁多徒自瘦。相如意密有誰傳。金塘雨過猶疑夢。翠袖風迴祇恐仙。日上秦樓休寄詠。東方千騎擁輜軒。露冷星翻月上弦。九枝銀燭照金鈿。應知韓掾偷香夜。猶記潘郎擲果年。天上明河雖可望。苑中高柳未經眠。烏啼人散青樓曉。堂下輕風轉莢錢。

劉筠

曾許千金答浣沙。越溪浪淺不通槎。曉樓簾卷還凝霧。外院牆低卻映花。滿目離愁頻駐馬。一春幽夢祇驚鴉。柔桑蔽日南城路。懊惱羅敷自有家。早爨銀鞍狹路逢。長裙連帶任流風。身輕近識吳宮燕。目斷還驚洛浦鴻。未許香囊安肘後。獨憐丹枕在房中。南園蝴蝶飛無限。一一雌隨一一雄。

懷舊居

楊億

武夷仙穴近吾廬。鬪鴨闌摧菌閣虛。千畝歲儲妨種橘。百金春事廢觀漁。北山煙霧迷歸轍。南陌風塵化客裾。堂上金絲應已歇。豈惟蘭菊舊叢疎。

司封郎中知制誥錢惟演

武祀仙壇接里閭。琴堂水閣半臨虛。竹林舊享銅盤食。門巷今容駟馬車。楚國大言登宋玉。漢家答詔用相如。未知笳鼓歸何日。空鑱鱸庭春草疎。

劉筠

毛竹千叢蔽野亭。曉猿驚後亂峯青。漢庭已奏三千牘。周室仍繙十二經。紫殿深沈頻視草。緇幃寂寞自飛螢。振衣本爲蒼生起。肯向荀家祇聚星。

偶懷

楊億

銀礫飛晴霰。蘭英湛凍膠。年光侵葆髮。春恨寄雲袍。燕重銜泥遠。鴻驚避弋高。平生林壑志。誤佩呂虔刀。

劉筠

不才甘客難。多病豈旬休。可待乘軒寵。終慙舐痔求。渚蘭薰露夕。江橘富霜秋。養拙甯無地。千波一葉舟。

許洞歸吳中

楊億

春渚歸艎不暫留。青絲如葆恐逢秋。騷人已得江山助。賦客終陪霰雪游。三徑未荒休歎鵬。十漿先饋定

驚鷗洞庭霜橘粵田粟歲計猶堪比徹侯

劉筠

欲折瑤華向綠疇。風光滿目盡離愁。茂陵修竹多嘉客。萬壑千巖憶舊遊。漢詔已聞求汎駕。禰狂無自屈岑牟。荆山待價何憂晚。龜手猶期裂地酬。

錢惟演

草薰風暖接長亭。一曲驪歌倒綠醺。懷古更投元石賦。艤舟閒採紫莖萍。醉拋隋岸楊花白。吟過淮山桂樹青。可使長離終鍛羽。淵雲辭藻挾天庭。

上巳玉津園賜宴

劉筠

需雲分渥澤。禊飲恣歡游。緹幕侵晨設。蘭泉對席流。薰肴清蕙莆。玉醴湛金甌。春服萋萋盛。光風灑灑浮。桐花濃竟發。鶯語巧相求。好曲新聲合。斜陽醉未休。

楊億

禊飲逢元巳。春遊盛舞雩。流杯傳楚俗。飲賜出堯廚。玉樹天開苑。銀潢水貫都。肆筵環曲沼。飛蓋寒交衢。洛邑聲詩逸。蘭亭歲月徂。顏王有遺韻。待子一操觚。

錢惟演

漢家傳洛飲。楚俗泛蘭泉。玉液初頒酒。金盤屢擊鮮。弭彤尋竹籥。傾蓋集芝廛。錦羽翻晴旭。霞英落暖煙。

雅音和舜樂。容澤洽堯天。更聽承雲曲。同歌在鎬年。

致齋太一宮

錢惟演

齋潔奉惟馨。瑤臺獨自升。樓迷五里霧。壇燭九枝燈。珠館來青雀。璇題射玉繩。疎鐘平野闕。古柏夕霏凝。鶴扇真規月。仙衣可鏤冰。春茶泛雲液。曉飯薦蘭蒸。鍊藥疑洪井。藏書類羽陵。回瞻太帝室。飛檻更長憑。漢帝祈年館。威神法太微。赤章修祕祝。盤石拂仙衣。雉雘靈光發。鸞歌彩霧霏。霓旌飄夕吹。瑤草泛春暉。瓊屑晨杯滿。芝田晝茹肥。象樽猶一獻。鳧鳥自雙飛。天迴鸞輪度。宵殘素瑟希。回看葱鬱處。佳氣接彤闈。紫館天神貴。綸闈地望清。齋心奉蠲潔。攝事罄誠明。殿翼如軒翥。壇垓類削成。直官琳札密。太宰繡衣輕。薜荔羅芳席。虹蜺曳綵旌。星陳五帝佐。體薦一元牲。蒼駟回風馭。珍禽警露聲。丹霞升曉氣。若木競新英。挹袂甯無友。凌霄自放情。受釐宣室對。賈傅異諸生。

劉筠

直夜二首

楊億

月魄生宵暈。風鳥送晚涼。飛蠅隨鏤管。浮蟻溢清觴。負郭春耕廢。鈞天曉夢長。玉籤聲未斷。落宿半宮牆。鑪銷香篆霽餘芬。晏坐氍毹日易曛。虎圈微涼生夕籟。鶴天新霽見歸雲。通中夢穩春寒薄。蕭唱聲沈夜漏分。誤濯塵纓成底事。巖阿千古有移文。

瓊蕊滋晨飲。青縑擁夜衾。萬年宮省樹。五色帝家禽。詔草裁藤角。熏爐燼水沈。浴室還獨對。鳴佩有清音。嘉木清陰接綺窗。謫仙風骨凜冰霜。堯廚葦莆分珍膳。漢廟含桃和酪漿。磴道神行通碣石。井幹雲構俯瑤光。金缸璧月相輝映。獸口時飄侍_中香。

櫻桃

離宮時薦罷。樂府豔歌新。石髓凝秦洞。珠胎割漢津。三桃聊並列。百果獨先春。清籟來君賜。雕盤助席珍。甘餘應受和。圓極豈能神。楚客便羊酪。歸期負紫蓀。

楊億

劉筠

赤水分珠樹。薰風送麥秋。蜀都春氣早。漢苑夏陰稠。廟薦清和候。恩頒侍從流。楚昭萍已剖。韓嫣彈爭投。沉澆滋芳液。醞餉助品羞。玉盤光宛轉。全擬付歌喉。

暑詠寄梅集賢

楊億

點綴鮮雲紫。宙寬微風浙。浙起霜紈。魏臺清暑開冰井。漢殿延年啜露盤。天外一飛期汗漫。水邊千畝憶檀欒。流波意密知音少。可得延陵爲試觀。

劉筠

石渠岌業亘宛虹。元蔭清流接桂宮。玉女壺欵天未笑。羲和轡緩日方中。孝先便腹甯無誚。痴儂承蜩敢

銜功。蠲渴欲來飛雪散。南昌世冑有仙風。

苦熱

錢惟演

頻末風休飛閣深。亭亭日馭漸流金。火雲接影橫銀漢。水鳥無聲下翠陰。渴想孤山同飲露。煩思楚殿獨披襟。柘漿粒粒都無味。衛玠清羸欲不任。

楊億

極目長天度鳥稀。纖羅不動轉晨暉。已裁圓月班姬扇。更換輕雲子產衣。河朔一時觴對舉。臨淄萬井汗交揮。冰紈雪散成虛設。欲借飈輪玃紫微。

劉筠

六幕雲收萬籟沈。結瑤千尺倦登臨。七盤妙舞頻揮汗。五色嘉瓜平鎮心。極目嶺梅甯止渴。拂波宮柳漫垂陰。祇憂火解神仙骨。賴有泉聲發素琴。

錢惟演

赫日烘霞鬪曉光。雙文桃簟碧牙牀。頻傾蜜勺甯蠲渴。久捧冰壺未覺涼。雪嶺却思隨博望。風窗猶欲傲羲皇。更憐乳燕翻飛處。深入盧家白玉堂。

屬疾

積日勞無補。彌天疾未瘳。馬卿非避事。盛憲自多憂。目眩花成果。心驚蟻鬪牛。齒冰那浣熱。洛笛更生愁。

拂枕窗風度。穿簾隙日流。唾壺從已缺。博齒亦慵投。發篋尋桐錄。支頤動越謳。平生江海志。多夢繞滄洲。

翰林學士晁迥

精鶩成勤瘁。頤貞俟有瘳。吟生南越思。慈結北堂憂。粲枕甘爲蝶。豐廚厭炙牛。予元知寡欲。平子尙多愁。夕鳥侵塔啄。宵螢入樹流。玉書能靜覽。枉矢倦閒投。忽賦行雲什。堪聽擊壤謳。期君整朝佩。仙署在瀛洲。

左司諫直史館崔遵度

李白羹初美。相如渴漸瘳。八磚非性懶。三昧減心憂。筆宛多批鳳。公新集詞鋒勝解牛。舊山疑鶴怨。畏日想雲愁。廣內勞揮翰。通中羨枕流。使星方屢降。客轄未容投。好奏倪寬議。何須莊鳥謳。朝衣熏歇不待史。待仙洲。

劉筠

暫困秦王痔。無疑廣客虵。賤清唐內相。宅僻魯東家。行藥虹梁闊。披襟蕙徑斜。香凝虛白室。露泫紫微花。冰飲何嘗熱。瓊餐益自嘉。能經仙有術。龜息壽無涯。珍簞裁湘竹。輕巾覆越紗。逍遙成雅詠。屬和肯容巴。

楊億

因人話建溪舊居

聽話吾虛憶翠微。石曾懸瀑濺巖扉。風和林籟披襟久。月射溪光擊汰歸。露晞荒涼迷草帶。雨牆陰溼長苔衣。終年已結南枝戀。更羨高鴻避弋飛。

清風十韻

晁迥

仙馭來相慰。解顏良會稀。病蠲宜養素。趣遠欲忘機。懲躁甯無漸。延齡或可祈。影搖珠箔。聲泛鈿箏。微
委恨餘班扇。流歡入楚衣。陶潛知夢穩。韓壽畏香飛。氣爽蒼龍闕。涼生白虎圍。健資雞距筆。偷撼獸銀扉。
松下琴心逸。江東膾縷肥。宿懷真隱處。終約與同歸。

楊 億

素魄離箕舌。鳴鳶載錦綢。微涼生玉宇。餘韻泛蘭皋。竿轉相烏數。廚搖蓮莆勞。渚蘋偏霍靡。苑樹更蕭騷。
五斗醒初析。三年翼自高。陶窗時拂衽。楚榭正揮毫。塵篋悲鸞扇。雲帆戒鷺濤。洞庭驚木葉。騎省歎霜毛。
勢好搏羊角。心終憶蟹螯。泠然知有待。仙寇異吾曹。

劉 筠

闔闔重門啓。飛廉別館深。歎蒸全已却。雅興可能任。雲起汾河詠。旌搖楚國心。過簫添爽籟。拂野蕩層陰。
夕勁淮陽桂。晨淒越鄂衾。登高從落帽。安寢任吹襟。珠網疏難掩。銅鑪冷易侵。急翻池上葉。遙送月前砧。
舞袖更回態。歌梁極絳音。最憐鷓鴣意。瞬息度千岑。

錢 惟 演

溽暑迎秋盡。涼颺透曉迴。起萍初浙瀝。獵桂更徘徊。欲引長煙素。微飄畫燭煤。墜桐侵玉井。拂柳度章臺。
已覺雲翹動。還驚月幌開。蛟簾移亂影。瑤瑟泛餘哀。扇掩藏鸞羽。荷傾側露杯。正當荷左界。不待雨東來。
自好搏垂翼。甯勞起死灰。楚宮誰第賦。宋玉最多才。

李宗諤

閒館方迴暑。商飈乍應金。天高初起籟。松澹更宜琴。汾權傳歌遠。班詩託興深。東陽仁自布。西顛氣還侵。太液翻晴旭。靈和亂翠陰。舟輕飛燕袂。臺迴楚王襟。阮嘯經時盡。齊蟬度日吟。愁生孤戍角。響續暮城砧。空靜銷雲鏤。庭虛轉蕙心。賢哉吉甫頌。千載有遺音。

右諫議大夫薛 映

爽氣乘秋至。涼飈蕩暑初。泠泠含遠籟。械械動輕裾。翠幕波無際。修篁韻有餘。潛驚寒草綠。乍拂井桐疎。素髮愁郎將。霜紈感婕妤。窗光流熠燿。簾影亂蟾蜍。塵襲青絲騎。香飄紺轡車。故宮輕馭娑。別館度儲胥。薄暮來金埒。凌晨上玉除。甯同起窮巷。賸欲賦愁予。

劉 秉

何處來蘋末。蕭騷盡四鄰。金莖吹曉露。玉宇動輕塵。易水離歌闕。齊紈怨思新。泛蘭迷舊澤。落帽會佳辰。籬菊飄香遠。庭梧墜葉頻。帆開五湖客。槎去九霄人。曲沼鋪紋簟。平蕪偃綠茵。鴻飛資羽翮。鷹擊助精神。仙馭歸堪待。琴松韻更真。披襟同楚榭。千古自相親。

戊申年七夕五絕

劉 筠

伯勞東翥燕西飛。又報黃姑織女期。天帝聘錢還得不。晉人求富是虛詞。道書云牽牛娶織女。取天帝錢二萬備禮。久不還。被驅在營室。華寢星陳夜未央。橫河奕奕度神光。一年暫得停機杼。不奈秋蟲促織忙。

吹笙何處伴乘鸞。窺牖誰人見阿環。更有唐家今夕意。月和風露滿驪山。
浙浙風微素月新。鵲橋橫絕飲牛津。豈惟蜀客知蹤跡。更問庭中曬腹人。
琬車芝駕儼清秋。微雨侵宵助涕流。人世莫嗟離恨苦。却應天上更悠悠。

楊億

六幕西迴斗轉車。鮮雲點綴玉鉤斜。天孫已渡黃姑渚。阿母還來漢帝家。
明河左界鵲南飛。漢苑高樓正曝衣。一夕匆匆停弄杼。誰將錦石暫支機。
蘭夜沈沈鵲漏移。羽車雲幄有佳期。應將機上迴文縷。分作人間乞巧絲。
神女歡娛一夕休。月娥孀獨已千秋。爭如靈匹年年會。莫恨牛津隔鳳輶。
玉女壺傾笑電頻。白榆晴影接星津。神光奕奕雲容薄。誰見淩波襪起塵。

錢惟演

烏鵲飛來接斷雲。祇貪清淺度星津。不知一夜支機石。却屬乘槎上漢人。
玉露金河顯氣涼。辛夷車轉桂旗香。嫦娥可是多猜忌。不駐瓊輪放夜長。
一歲佳期一夕過。羽旗雲蓋涉微波。明朝若寄相思淚。玉枕金莖得最多。
青鳥當時下紫雲。綺囊書祕露桃新。莫嫌夜半移牀遠。朱雀窗中別有人。
驪阜淩雲對玉鉤。千門高切絳河秋。欲聞天語猶嫌遠。更結三層乞巧樓。

月放冰輪傍絳河。相期寶婺夜經過。嫦娥不惜宮中桂。乞與天香分外多。
碧天如水月如鉤。金露盤高玉殿秋。青鳥潛來報消息。一時西望九花虬。
漢殿初呈楚舞時。月臺風榭鎮相隨。如何牛女佳期夕。又待蠻輿百子池。
月露庭中錦繡筵。神光五色一何鮮。世閒工巧如求得。四至卿曹亦偶然。
銀河耿耿靈溥溥。綵縷金針玉佩環。天媛貪忙爲靈匹。幾時留巧與人閒。

薛映

劉秉

斜漢西傾桂魄新。停梭今夕度天津。世閒縱有支機石。誰是成都賣卜人。
紅蕖爛漫碧池香。羅綺三千侍漢皇。阿母暫來成底事。茂陵宮桂已蒼蒼。
香階寶砌靜無塵。遙指星河再拜人。若把離情今夕說。世閒生死最傷人。
北斗城高禁漏多。漢家宮殿奏笙歌。漫教青鳥傳消息。金簡長生得也麼。
珠箔風輕月似鉤。還將錦繡結高樓。堪傷乞巧年年事。未識君王已白頭。

秋夕池上

錢惟演

玓月上金塘。煙容帶水光。朱華接蘭坂。綠荇溢魚防。叢暗禽棲密。松疎露下涼。秋懷已潘鬢。無奈更啼螿。

楊億

蓮塘帶弋林。清吹滌煩襟。泉咽猶鳴玉。臺傾舊築金。僵桃蟲自蠹。怪石蘚交侵。此夜悲秋客。烟蛩亦伴吟。

偶作

楊億

翹車蕊佩謁明光。禁籞多年費稻粱。祇羨泥塗龜曳尾。翻嫌霧雨豹成章。鳴鳩春穀先疇廢。寒蝶秋菘老圃荒。歸計未成芳節晚。更憂禽鹿顛纓狂。

劉筠

殺青和墨度流年。飽食無功鬢颯然。却憶侯封安邑棗。不能兄事魯褒錢。千峯月白猿啼樹。六幕風高鶚在天。招隱詩成誰擊節。願傾家釀載漁船。

螢

劉筠

荒郊多腐草。故苑近清秋。棘密何勝數。囊輕莫盡收。日高疑燭息。天遠認星流。紫桂風微急。紅蘭露徧浮。已能穿永巷。更欲拂高樓。滅燭方無寐。鳴蛩相薦愁。

楊億

爽籟生遙圃。斜暉落半岑。微茫浮草際。零亂起牆陰。武子窗塵積。隋家苑樹深。燈光透疎隙。珠彩射清潯。野燐宵爭出。星榆曉共沈。長門秋漏永。偏照淚潏潏。

右西崑詠唱集二卷。宋楊億等撰。按億事蹟具宋史本傳。詠唱諸人名氏具集中。舊鮮傳本。國初徐健菴鈔版後。同時復再刻。具見馮武序。考蔡寬夫詩話稱國初沿襲五代之餘。士大夫皆宗白樂天詩。故王黃州主盟一時。祥符天禧之間。楊文公劉中山。錢思公。專喜李義山。故崑體之作。翕然一變。隱居詩話稱楊億劉筠作詩。務故實而語意輕淺。一時慕之。號西崑體。識者病之。歐公云。楊大年詩。有峭帆橫度官橋柳。疊鼓驚飛海岸鷗。此何害爲佳句。余見劉子儀詩句。有雨勢宮城闊。秋聲禁樹多。亦不可誣也。古今詩話稱楊大年。錢文僖。晏元獻。劉子儀爲詩。皆宗義山。號西崑體。後進效之多。竊取義山詩句。嘗內宴。優人有爲義山者。衣服敗裂。告人曰。吾爲諸館職。擣搗至此。聞者大噱。然大年咏漢武詩云。力通青海求龍種。死諱文成食馬肝。待詔先生齒編貝。忍令乞米向長安。義山不能過也。冷齋夜話稱詩到義山。謂之文章一厄。以其用事僻澀。時稱西崑體。然荆公晚年。亦或喜之。宋時人議論不同如此。善乎元遺山論詩絕句云。詩家總愛西崑好。獨恨無人作鄭箋。又云。古雅難將子美親。精純全失義山真。蓋義山詩之佳者。直接杜陵之脈。此可爲知者道。集中不無利鈍互陳之處。讀者須分別觀之耳。至學崑體諸人。亦未必盡得義山真諦。故是集亦往往蘭艾齊列。而究非多閱古籍者不辦。遠勝於束書不觀。而自詡學王孟學白香山。學東坡山谷。其流弊不可勝言。乃以嚴滄浪之說自解曰。詩非關學也。咸豐甲寅百花生日後。南海伍崇曜跋。

上海图书馆藏书



A541 212 0009 1159B

中華民國三十年八月初版

(81202.2)

☆西崑詠唱集一冊

每冊實價國幣叁角

外埠酌加運費匯費

撰 者 楊 億 等

發 行 人 王 雲 五

長沙南正路

印 刷 所 商 務 印 書 館

發 行 所 各 商 務 印 書 館

徐



守道